

GOUVERNEMENT
DE LA REPUBLIQUE
DE VANUATU

MINISTERE DE L'EDUCATION
ET DE LA FORMATION

Sac De Courier Privé 028
Port Vila, Vanuatu
Tel : (678) 22309 or (678) 33500



GOVERNMENT
OF THE REPUBLIC
OF VANUATU

MINISTRY OF EDUCATION AND
TRAINING

Private Mail Bag 028
Port Vila, Vanuatu
Tel : (678) 22309 or (678) 33500

CABINET DU MINISTRE - OFFICE OF THE MINISTER

Namba 9 Jun 2020

INFOMESEN IA HEMI STAP KAM LONG MI OLSEM MINISTA BLONG MINISTRI BLONG EDUKESEN MO TRENING MO HEM I STAP GO LONG EVERI PRINSIPOL, TIJA, STAF, SKUL KOMUNITI, PEREN MO OL STUDENT RAON LONG KAONTRI FOLEM STIMULAS PAKEJ WE KAVMAN HEMI PROFADEM BLONG OLGETA SKULS MO PSET PROFAEDA RAON LONG KAONTRI

Folem anaonsmen blong everi skul mo PSET profaeda raon long kaontri blong oli openem ol doa blong olgeta long namba 1 Jun 2020 mo bae oli kontiniu watem nomal operesen blong skul, Ministri hemi stap wok tugeta watem Ministri blong Faenens mo Ekonomik Manejmen blong mekem sua se Gavman hemi save givhan long everi skul mo PSET profaeda tru long Ekonomik Stikulas Pakej we Gavman, tru long ol Kaonsel blong ol Minista, oli bin agri blong hemi kasem olgeta skul mo PSET profaeda raon long kaontri.

FES PAT BLONG STIMULAS PAKEJ HEMI GRANT BLONG OL SKUL MO PSET PROFAEDA

Olgeta infomesen we wan wan skul o PSET profaeda hemi mas save hemi olsem:

Namba 1. Long ol **kindagaten** we hemi rejista watem Ministri, bae olgeta **no risivim eni moni blong stimulas pakej**, from se Gavman hemi pem finis ol tija long wan wan kindagaten, mo hemi givim tu wan grant blong 9,000 vatu blong wan wan pikinini long wan yia;

Namba 2. Long ol praemeri skul, bae olgeta **Gavman mo Non-Gavman assisted praemeri skul** we hemi rejista watem Ministri, bae olgeta **no risivim eni moni blong stimulas pakej**, from se Gavman hemi pem finis ol tija long ol praemeri klas, mo hemi givim tu wan grant blong 8,900 vatu blong wan wan pikinini long wan yia;

Namba 3. Long ol **Non-Gavman o praefet praemeri skul** we hemi rejista watem Ministri, bae Gavman hemi givim wan grant blong 42,000 vatu blong wan wan pikinini long yia ia. Gavman hemi givim grant ia blong helpem olgeta Non-Gavman o praefet praemeri skul raon long kaontri blong oli save profaedem ol matiriol blong tijing mo lening insaed long klasrum, mo long sem taem tu, blong givhan long olgeta skul ia blong pem olgeta tija blong skul blong olgeta, folem had taem we wan wan skul hemi stap go tru long hem nao ia, folem ol situesen we hemi stap long kaontri.

Namba 4. Long ol **Gavman mo Non-Gavman assisted sekonderi skul** we oli tijim yia 7 kasem yia 10 mo oli rejista watem Ministri, bae olgeta **no risivim eni moni blong stimulas pakej**, from se Gavman hemi pem finis ol tija long ol sekonderi klas, mo hemi givim tu wan grant blong 42,000 vatu blong wan wan pikinini long wan yia;

Namba 5. Long ol **Non-Gavman o praefet skonderi skul** we oli tijim yia 7 kasem yia 10 mo oli rejista watem Ministri, bae Gavman hemi givim wan grant blong 42,000 vatu blong wan wan pikinini long yia ia. Gavman hemi givim grant ia blong helpem olgeta Non-Gavman o praefet sekonderi skul raon long kaontri blong oli save profaedem ol matiriol blong tijing mo lening insaed long klasrum, mo long sem taem tu, blong givhan long olgeta skul ia blong pem olgeta tija blong skul blong olgeta, folem had taem we wan wan skul hemi stap go tru long hem nao ia, folem ol situesen we hemi stap long kaontri.

Namba 6. Long ol **Gavman mo Non-Gavman assisted mo Non-Gavman o praefet skonderi skul** we oli tijim yia 11 kasem yia 14 mo oli rejista watem Ministri, bae Gavman hemi givim wan grant blong 42,000 vatu blong wan wan pikinini long yia ia. Gavman hemi givim grant ia blong helpem olgeta Non-Gavman o praefet sekonderi skul raon long kaontri blong oli save profaedem ol matiriol blong tijing mo lening insaed long klasrum.

Namba 7. Long saed blong ol **PSET profaeda**, everi wan oli mas rejista watem Vanuatu Kwalifikesen Otoriti, mo olgeta cos we wan wan PSET profaeda hemi tijim hemi mas bi apruv watem Vanuatu Kwalifikesen Otoriti. Bae Gavman hemi givim wan grant blong 42,000 vatu blong wan wan pikinini long yia ia. Gavman hemi givim grant ia blong helpem olgeta PSET profaeda raon long kaontri blong oli save profaedem ol matiriol blong tijing mo lening insaed long klasrum, mo blong helpem ol PSET profaeda blong pem olgeta trena blong olgeta, folem had taem we wan wan PSET profaeda hem i stap go tru long hem nao ia, folem ol situesen we hemi stap long kaontri.

Blong mekem hem i klia nomo se bae Gavman i **no pem grant i go long ol intanasonal student we oli stap skul insaed long kaontri.**

Mo long sem taem tu, bae Gavman i **no pem grant i go long ol student blong Vanuatu we oli stap skul aotsaed long kaontri.**

SEKON PAT BLONG STIMULAS PAKEJ HEMI SMOL ALAOENS BLONG OL WOKMAN WE OLI WOK LONG OL SKUL

Ministri hemi stap kontiniu blong wok wetem ol skul blong oli givim ol infomesen blong ol wokman blong skul blong Gavman hemi save givhan blong pem wan smol alaoens blong helpem blong pem ol wokman blong skul folem situesen we hemi stap long kaontri. Folem ol tingting antap, pakej ia bae hemi kaveremap olgeta Gavman mo non-Gavman asisted skul we oli rejista watem Ministri we oli stap tijim Klas 1 kasem Klas 6; mo bae hemi kaveremap everi skul we oli rejista watem Ministri we oli stap tijim Yia 7 kasem Yia 14.

WANEM NAO RIKWAEMEN BLONG STIMULAS PAKEJ

Folem tingting blong Ekonomik Stimulus Pakej blong ol skul mo PSET profaeda, Ministri hemi bin stap lettem everi skul mo PSET profaeda raon long kaontri blong oli fulumap ol infomesen blong skul mo everi student blong olgeta i go insaed long Open VEMIS, we hemi Edukesen Manejmen Infomesen Sistem we Ministri hemi stap yusum everi yia blong puttum ol infomesen blong ol skul, student mo tija o trena hemi go insaed long hem. Yumi everiwan i mas save se **Skul Census Dei hemi long 31 Maj everi yia** mo Ministri hemi bin givim sam moa taem blong everi skul mo PSET profaeda blong oli komplitim gud ol infomesen ia, insaed long Open VEMIS, kasem namba 31 Mei 2020.

Stat long last week, Ministri hemi stat blong risivim konfemesen long olgeta Provinsol Edukesen Ofis blong konfemem sam long olgeta skul mo PSET profaeda we oli finisim gud infomesen blong everi student i go insaed long Open VEMIS. Trifala fes provins we oli konfem se sam skul blong olgeta oli komplitim infomesen blong ol student long Open VEMIS hemi provins blong MALAMPA, SANMA, TAFEA provins. Bae long wik ia bae Ministri hemi komplitim proses blong jekem ol infomesen long Open VEMIS mo bae stat blong askem Ministri blong Faenens mo Ekonomik Manejmen blong pem aot ol grant blong stimulus paketj i go long olgeta skul mo PSET profaeda we oli mitim ol rikwaemen ia.

Ministri hemi wandem talemaot long everi prinsipol, tija, staf, skul komuniti, peren mo ol studen se bae hemi wok kolosap watem Ministri blong Faenens mo Ekonomik Manejmen blong pem aot ol grant long stimulus pakej long manis ia Jun 2020.

LONG SAED BLONG NOMOL GRANT BLONG TRANJ 2 2020 WE GAVMAN HEMI SHUD PEM AOT LONG JULAE

Ministri hemi wandem talemaot tu se bae hemi kontiniu blong wok kolosap watem Ministri blong Faenens mo Ekonomik Manejmen blong pem aot **nomol Tranj 2 2020 grant stat long manis ia tu**, sipos olgeta skul oli mitim ol kraetiria blong skul grant.

Mi wandem tekem taem ia blong rimindem yumi everiwan long ol kraetiria blong wan skul hemi save risivim skul grant.

Namba 1. Ol skul oli mas tijim Vanuatu Nasonel Kurikulum;

Namba 2. Everi infomesen blong student, we hemi inkludim Birth Registresen Namba blong student, hemi mas stap insaed long Open VEMIS;

Namba 3. Everi faenensol ripot blong skul we skul kaonsel hemi appruvum, kasem Maj 2020, hemi mas stap insaed long Open VEMIS;

Namba 4. Ol skul oli mas gat wan Skul Impruvmen Plan, we Skul Kaonsel hemi appruvum blong 2020;

Namba 5. Ol skul oli mas gat wan aktif Skul Kaonsel blong 2020; mo

Namba 6. Ol skul oli no mas gat eni isiu blong audit long skul blong hem.

Folem ol infomesen we mi jes stap talemaot, mi stap askem yumi everiwan blong **sapotem ol skul mo PSET profaeda blong givhan long ol student blong kontiniu watem edukesen mo trening** blong olgeta.

Lo sem taem tu, folem situesen blong COVID-19 we hem i stap iet long kaontri, Ministri blong Edukesen mo Trening hemi stap enkarejem tu everi skul mo PSET profaeda blong oli **kontiniu blong leftemap gufala fasin blong helt mo haejin long ol skul.**

Vanuatu hemi bin go tru long fulap jalenj long yia ia mo long behaf blong Ministri blong Edukesen mo Trening mi wandem tekem taem ia blong talem bigfala tangio long everi prinsipol, tija, staf, skul komuniti, peren mo ol studen we oli wok tugeta blong sapotem edukesen mo trening blong ol student blong yumi blong oli save kam ol gudfala lida blong tumoro.

Bae God hem i kontiniu blong blessem mo lukaotem gud yumi everiwan.

Tagio tumas.



Honorable Sebule Simeon

Minista blong Edukesen mo Trening

